

KPT pendekkan tempoh pengajian kepada 3 tahun

oleh NAZRIN ZULKAFLI 04 Jun 2023 12:04pm **Masa membaca: 2 minit**



Mohamed Khaled (kanan) selepas merasmikan Majlis Penutupan Program Jom Masuk U 2023 di Universiti Malaya pada Ahad. - Foto SINAR HARIAN/MOHD RAFIQ REDZUAN HAMZAH

KUALA LUMPUR - Kementerian Pendidikan Tinggi (KPT) akan memendekkan tempoh pengajian sesetengah program daripada empat tahun kepada hanya tiga tahun.

Menterinya, Datuk Seri Mohamed Khaled Nordin berkata, atas dasar itu, sebanyak 44 program pengajian dari sembilan institut pengajian tinggi awam (IPTA) telah dikenal pasti untuk dipendekkan tempoh pengajiannya.

Menurut beliau, perkara tersebut mampu mengurangkan jumlah pinjaman atau kos pengajian yang perlu ditanggung selain membuka peluang untuk graduan memasuki pasaran kerja setahun lebih awal.

"Kementerian Pengajian Tinggi (KPT) sentiasa mengemas kini program dan jurusan yang ditawarkan oleh IPT di seluruh negara.

"Kita mahu program dan jurusan tersebut disusun dengan cara terbaik dan menguntungkan semua pihak," katanya semasa Majlis Penutupan Program Jom Masuk U 2023 di Universiti Malaya pada Ahad.

Tambah beliau, pengurangan tempoh pengajian itu tidak melibatkan institut pengajian tinggi swasta (IPTS).

Bagaimanapun katanya, ia terpulang kepada IPTS itu sendiri untuk melaksanakannya.

Sebelum ini pada 25 Februari, media melaporkan KPT sedang mencari jalan untuk mengurangkan beban pelajar, termasuk dengan memperkenalkan kursus fleksibel dan memendekkan tempoh pengajian bagi program tertentu di universiti awam.

Mohamed Khaled berkata, langkah itu akan membolehkan pelajar menjalani pengajian di rumah selama dua tahun, sebelum menamatkan baki kursus mereka secara fizikal di universiti.

Tambahnya, kementerian juga akan melihat untuk menambah baik yuran pengajian bagi kursus-kursus yang akan mengurangkan penggunaan kemudahan universiti.